

Pueblo tin derecho di mira raport di IMF

ORANJESTAD(AAN) Cada biah cu expertonan financiero di exterior bin Aruba pa evalua un ke otro riba tereno di finanzas di pais Aruba, ta gobierno despues ta bisa pueblo kico tabata e resultado.

Pueblo ta depende completamente riba gobierno pa loke ta trata informacion di e situacion financiero y e forma con informacion ta worde duna ta cuestionable pasobra te awe un cara abao tras di otro so pueblo a haya di gobierno, cu ta pretende di ta hiba un maneho transparente.

Prome Ministro algun tempo pasa hunto cu e ministro di economia anterior a anuncia cu pais Aruba tabata e pais mas rico na mundo, pa poco despues, cu hopi hende a core bay compra cas y hinca nan mes den debe basando nan mes riba declaracionnan falso saca di gobierno, e mesun gobierno anuncia cu pais Aruba tin problemanan financiero serio.

Keto bay gobierno ta keda para riba cu cos ta bon y cu ta placa atrasa di belasting ta un di e problemanan grandi, pero tur e tempo cu nan a sinta gobernanan no a haci nada pa sanear e situacion tecnico y organisatorio den Belastingdienst.

No ta cierto ex parlamentarianan cu ta forma parti di coalicion actual den tempo cu

nan tabata den oposicion a para grita cu voz rebelde den parlamento, cu nan lo bay core cu tur technische bijstander y cu Aruba no mester di ningun placa mas di KABNA?

Ora cu gabinete Eman a sinta pueblo a kere cu e problema di technische bijstand cu tabata costa pueblo miyones pa aña lo worde solucionado y cu yunan di tera experto cu tabata den exterior por a haya oportunidad pa bolbe nan pais y haci e trabao cu technische bijstandernan Hulandes tabata haci, pero lo contrario a tuma lugar.

Pais Aruba a haya su mes pega cu mas technische bijstander y cu e placa cu Aruba ta haya di Hulanda ta bay casi completo pa cubri gastonan di technische bijstandernan.

Cu un batayon di technische bijstander Hulandes cu ta biba manera rei na Aruba, Belastingdienst no a logra ningun avance y awor den pura gobierno ta core pusha aanslagan bieu den stoma di pueblo y pone presion pa pueblo paga den pura.

Na lugar di no depende mas di placa di Hulanda awor gobierno di Aruba a bay roga Hulanda pa Hulanda duna mas placa di ayudo di desarojo.

Hulanda na su turno a probecha di expresionnan haci

di parti di politiconan cu actualmente ta ministro y a scoge pa den realidad hinca Aruba den e skina cu gobierno mes a hinca e isla aden esta cu Hulanda no ta duna placa mas.

Raport Calidad cu tur hende tin un boca yen di dje no ta funciona y no lo funciona hamas si leynan cu ta tene ministronan responsabel pa nan maneho no ser pasa door di parlamento.

IMF su hendenan lo bolbe bay evalua situacion financiero di pais Aruba y e biah aki tur raport confidencial di IMF mester worde publica pa pueblo mes por saca su conclusion.

No por ta asina cu hendenan di IMF ta bin analiza e situacion y si e evaluacion no sali bon pa Aruba, (ban spera cu esaki no lo ta e caso!) cu gobierno por djis bolter henter e cuenta y core publica comunicadonan cu ta pinta cos mas bunita cu nan ta.

Pueblo no kier bolbe pasa den e mesun experiencia cu gobierno ta bisa cu cos ta bon, pa despues pueblo bolbe tende cu cos ta malo pasobra e biah aki no tin awa pa laba y no tin rek mas den e elastiek di pasenshi y comprension di pueblo; debi cu awa a cuminsa yega na lip di pueblo sintando riba un barco cu ta casi zink financieramente.

Festival di Tumba tabata bashi debi na entrada caro

ORANJESTAD(AAN) E cantidad di hende cu a acudi na e Festival di Tumba Grandi tabata poco debi na e prijs di entrada cu tabata demasiado halto.

Tur hende tabata keha cu e prijs di 25 Florin pa e evento di Tumba tabata mucho halto y cu si e prijs tabata por ehempel 15 Florin o 10 Florin, anto e Ballpark lo tabata rand rand di hende.

Mayoría famia a sinta rek nan som y a yega na e conclusion cu si por ehempel un mama, tata y dos yiu kier a bay Festival di Tumba, na entrada so nan lo a perde 100 Florin.

Entrada no ta tur cos paso-

bra un festival asina ta dura basta largo y hende tin cu come y bebe henter anochi pa madrugá te ora cu e festival acaba.

Ningun hende ta bay paga 25 Florin pa keda un ora y despues bay cas.

Un famia consistiendo di 4 persona a gasta un promedio di 200 Florin (incluyendo entrada) riba anochi di Festival di Tumba y pa mayoría hende e prijs di entrada tabata e obstaculo financiero grandi cu a pone nan keda cas y wak e festival via television.

Comerciantenan cu tabata bende nan productonan den Festival di Tumba a nota cu e prijs di entrada tabata tin su

consecuencianan negativo pa e venta di cuminda y otro productonan.

SAC y Asoma por bin bisa pueblo mayan cu si mester calcula e cantidad di banda pa e prijs di 25 Florin, anto esaki tog ta barata, pero pa un famia di 4 hende saca 100 Florin pa drenta so, esaki ta algo cu awendia mirando e situacion financiero cu pais Aruba ta pasando aden un problema grandi.

Ta di spera cu Calypso Festival no lo bay tin como entrada un suma halto pasobra e mesun situacion por presenta su mes cu e cantidad di hende cu lo bay lo ta poco manera cu a pasa cu Festival di Tumba.

Robert Jeandor a raspa den Festival di Tumba



ORANJESTAD (AAN) Robert Jeandor durante su tempo como musico internacional y e unico yiu di tera cu a yega di toca na diferente ocasion den Madison Square Garden den Festival internacional di Salsa cu e grandinan di mundo, a siña di e musico Dominicano Johnny Ventura cu "si bo subi escenario sea prome cu otro o despues di otro banda, wak pa esnan cu a bay prome cu bo o peor ainda esnan cu bin despues di bo, pa nan wak con nan ta bay rek nan som y wak pa abo bati musica pa laga tur hende bira loco".

Esaki ta loke Robert Jeandor y su banda a haci tambe durante Festival di Tumba den fin di siman, pasobra e impacto cu Robert Jeandor y su banda a bolbe haci cu nan actuacion musical, a pone publico presente y na cas riba abao.

For di e prome piesa cu Robert Jeandor y su banda a cuminsa toca den Festival di Tumba, e ambiente den Don Elias Mansur Ballpark a cam-

bia radicalmente; hendenan a cuminsa balia, grita, canta y bira alegre y pa e cantantenan cu Robert a acompaña, esaki tabata un ventaha grandi riba tur otro competidor.

Robert Jeandor y su banda a yega, subi escenario, bati musica, pone tur hende riba abao y logra di acompaña e garandor di Festival di Tumba tambe y asina cay den e prijs maximo.

Pa e banda cu a acompaña e ganador, e anochi di Festival di Tumba tabata otro logro grandi y un biah mas a worde confirma cu tur musico y cantante cu kier bay participa den cualquier evento musical local, cu nan mester tene debito cuenta cu Robert Jeandor y su banda, pasobra caminda Robert y su Solo Banda Show haya e oportunidad nan ta pasa raspa y no ta laga nada pa otro!

Un pabien grandi ta bay pa Robert y su banda y hopi exito den Calypso Festival cu tambe lo bay ta un bataya grandi entre musiconan y bandanan local.